

# VITOUR GELU

Sa placo, que Marsiho avié enlevado pèr sougna sa fierta de *Capitalo de la Culturo*, es retroubado...



# Prouvènço d'aro

Tóuti li mes, lou journau de la Prouvènço d'aro

Febrié de 2015

n° 307

2,10 €

## Aquest cop lou comte es bon pèr 13

Aqueste cop èi decida, la Franço sara desenant partido en trege Region.

13 Region artificialo, decoupado de brico e de broco, mai o mens à l'asard, en seguissènt li countour di despartamen apela à desparèisse...! Ço qu'es un noun-sens.

13 Region soucamen pèr faire plesi à Brusselo que despièi dès an demando à la Franço de refourma sis estruturo amestrativo. E la Franço s'es agroumelido davans Brusselo sènso reguigna lou mens dóu mounde.

13 Region que pèr uno bono part soun establido sènso teni comte de l'Istòri, dis us, di coustumo, dóu patrimòni culturau e evidentamen, pèr d'esperit parisen, sènso teni comte di lengo regionalo.

Es uno vergougno? Vesèn ansin l'Alsaço e la Lourreno apariado e mesclado à la Champagno, de païs qu'an pas rèn de comun! Vesèn peréu uno outro bestiso, pèr pas dire outro causo, la Bretagno privado dóu despartamen de la Lèiro-atlantico, la Bretagno privado de sa capitalo istourico, Nanto.

E parlaren encaro dóu Jura e la Franco-Coumtat, de tradicioun espagnolo restacado à la Bourgougno sènso rimo ni resoun; lou Cantau dins la memo Region que la Savoia. l'a peréu uno outro grosso soutiso èi de vèire la Prouvènço isoulado dis àutri terro d'O, coume s'erian pas lis eiretié d'uno memo civilisacioun, d'uno memo culturo entre gènt qu'an la memo lengo, aquelo di troubadour. Mai curiosamen, La Franço qu'a toujour counsidera — bestiamen — la region parisenco coume lou cèntr de la Franço, aquesto Region d'Isco de Franço èi pas restacado à la Region Cèntr.


Anan pas countunia nosto roumegado, poudèn rèn que coustata qu'em' aquéu chaplage decida pèr de teinoucrate abrusseli (fourma sus Brusselo!) revenèn à-n-uno meno de centralisacioun encaro mai duro qu'aquelo d'avans.

Aquesto nouvello mapo di Region èi la negacioun puro e simplo de ce qu'a fa la Franço de-long di siècle, la negacioun de soun istòri, de soun patrimòni; èi la preparacioun à-n-uno unifourmisacioun mai sarrado, mai forto.

De remarca que lou pople èi pas esta counsul-ta sus aquesto espetaclouso reformo, adounc èi tambèn la negacioun de la demoucraciò. Revenèn à l'age-mejan, quand de segnour se partejavon de territòri sènso teni comte de l'avejaire di gènt dóu païs que d'aquéu biais devien pas quinca, oubeï e ... paga li taio!

J-M. C

## Ives Rouquette a parti...



**Lou pouèto Ives Rouquette, figuro emblematico de la sauvo-gardo de lengo d'oc nous a quita lou 4 de janvié.**

Nasquè à Sèto lou 29 de febré 1936, mai passè soun enfango en Aveiroun à Camarès. Pièi, proufessour de francés, dispensè soun ensignamen à Beziés, mai soun coumbat lou menè rèn que pèr l'aparamen de la lengo ócitan au coustat de sa mouié Mario Rouanet e de soun fraire Jan Larzac.

lé sian devènt d'uno di proumiéris escolo bilengo "Calendreta" oute se coumencè d'ensigna en francés e en ócitan.

Ome d'acioun autant que pouèto, fondè en 1965 la revisto "Viure" entre que s'endevenié l'animatour maje dóu mouvamen autounoumisto "Volèm viure al païs".

Fuguè tambèn lou foundadou de l'oustau de disque "Ventadorn" en 1969 que veguè l'espelissoun de la cansoun ócitan emé li bèu cantaire coume Patric,

Cardabela vo Glàudi Marti.

Es éu encaro que farguè en 1974 lou Cèntr Internaciounau de Documentacioun Ócitan à Beziés, devengu aro lou CIRDOC, Cèntr Interregionau de Desvouloupamen de l'Ócitan.

Mai es lou coumbatènt que faguè mirando. Ives Rouquette fuguè de tóuti li coumbat, Decazevilo, lou Larzac, e li lucho vigneirouno. Ives Rouquette tenié encaro uno counrico semaniero dins l'edicioun dóu dimenche dóu journau "La Dépêche du Midi", titrado "Accent d'Oc". Clafido d'aneidoto persounalo escrivé coume s'es di, nosto istòri en un fuitoun passionnant. Fau saupre qu'avié coumença en 1974, emé la rubric "En occitan" dins "La Dépêche du Midi" e, en tout, publiquè mai de 800 article d'aquelo meno. D'article nourri de culturo e d'umanita que nous auran guida dins aquéu debut de siècle vioulènt, pous-

què escrièure lou journau. Lis aparaire de la lengo fuguèron nombrous dins soun vilage de Camarès pèr ié rèndre un darnier oudenage.

Emai lou Maire de Beziés, Roubert Ménard, vèn de faire saupre qu'anavo bateja uno carriero dóu noum d'Ives Rouquette e que lou groupe escolari de la vilo pourtarié tambèn soun noum. Ives Rouquette es l'autour d'un trentenau de libre, recuei de pouèsio, rouman, pèço de tiatre, e de conte. Avié tambèn revira mant un di cap d'obro de la literaturo franceso e italiano.

*L'escriveire public*, 1958  
*Lo mal de la tèrra*, 1960  
*Josep-Sebastià Pons*, 1963  
*Lo poèta es una vaca*, 1967  
*Oda a Sant Afrodisi*, 1968  
*Roèrgue si*, 1968  
*Messa sens ren pels pòrcs a vendre*, 1970  
*La nouvelle chanson occitane*, 1970  
*Joan sens tèrra*, 1972

*Los negres siam pas sols*, 1972  
*Quand lo sang es tirat, lo calbeure*, 1972

*Made in France*, 1972  
*Vila dubèrta*, 1973  
*En occitan dans le texte*, 1973  
*Lo fàc es al cementèri*, 1974  
*Las cronicas de Viure*, 1975  
*Lo trabalh de las mans*, 1976  
*Ponteses, poemascronicas*, 1976  
*Lo castèl dels cans*, 1977  
*Lengadòc roge*, 1984  
*Petit traité de géographie cordiale*, 1984  
*Lo cant de la tèrra suspenduda*, 1985

*Lo filh del paire*, 1985  
*Dels dos principis*, 1987  
*L'escritura, publica o pas*, 1988  
*Lo boçut que voliò faire lo torn de França*, 1989  
*Occitanie, notre terre*, 1990  
*Cathares*, 1991  
*Cellula XIII*, 1992  
*La ciutat negada*, 1992  
*Midis*, 1992  
*Sète et son archipel*, 1993  
*Le fils du père*, 1993

### Jan-Enri Fabre lou pouèto

Lou celèbre entoumoulougisto èro majourau dóu felibrige...

Pajo 12

### La gramatico plan-planet 3

Lou tome tresen de la gramatico prouvençalo de Bernat Giély es aqui...

Pajo 8

### La culturo dins lou mounde di bèsti

Saique! ... Emé l'evolucioun animalo, li singe sinjarien lis ome...

Pajo 6